

Na osnovu Poglavlja IV Odjeljak A člana 23. Ustava Bosansko – podrinjskog kantona Goražde („Službene novine Bosansko-podrinjskog kantona Goražde“, broj: 8/98,10/00 i 5/03) i člana 106. i 108. Poslovnika Skupštine Bosansko-podrinjskog kantona Goražde („Službene novine Bosansko – podrinjskog kantona Goražde“ broj: 10/08), Skupština Bosansko – podrinjskog kantona Goražde, na svojoj ____-toj redovnoj sjednici, održanoj dana _____2013.godine, **d o n o s i**

ZAKONA O JAVNIM SKIJALIŠTIMA NA PODRUČJU BOSANSKO-PODRINJSKOG KANTONA GORAŽDE

DIO PRVI OSNOVNE ODREDBE

Član 1.

(Sadržaj zakona)

Ovim Zakonom propisuju se: uvjeti za uređenje, održavanje i opremanje javnog skijališta, pružanje usluga na skijalištu, obilježavanje i postavljanje signalizacije na skijalištu, korištenje sredstava prijevoza na skijalištu, bezbjednost i red na skijalištu, podučavanje na skijalištu, kao i druga pitanja koja su od značaja za korištenje skijališta.

Član 2.

(Primjena propisa)

Poslovi iz člana 1. ovog Zakona obavljaju se u skladu sa ovim Zakonom i drugim zakonima kojima se uređuju pitanja koja se odnose na skijališta i vertikalni transport.

Član 3.

(Značenje izraza upotrebljenih u Zakonu)

Pojedini izrazi upotrijebljeni u ovom Zakonu, ako drugačije nije određeno, imaju slijedeće značenje:

1. **usluge na skijalištu** su organizovanje skijanja i specijalizovanih zimskih sportskih aktivnosti, podučavanje skijanju, iznajmljivanje i servisiranje opreme za skijanje, prihvatanje i usluživanje skijaša i drugih korisnika skijališta;
2. **skijanje** je zimska sportska aktivnost rekreativnog ili takmičarskog karaktera koja se sastoji iz alpskog skijanja, nordijskog skijanja, skijaških skokova, snowboarda, slobodnog skijanja, skijanje na travi, cross-countrya, brzog skijanja i telemarka;
3. **skijaš** je fizičko lice koje se u cilju rekreacije bavi skijanjem na ski stazi, ili se nalazi na ski stazi radi skijanja;

4. **ski staza** je uređena i obilježena površina skijališta, namijenjena za skijanje i podučavanje skijanju;
5. **ski poligon** je uređena i obilježena površina skijališta namijenjena specijalizovanim zimskim sportskim aktivnostima;
6. **ski ruta** je obilježena površina za vožnju skijama koju skijaški centar ne obezbjeđuje od neuobičajenih i neočekivanih opasnosti skijanja;
7. **ski put** je put napravljen ili otvoren za vožnju skijama koji predstavlja dio ski staze, međusobno povezuje ski staze ili povezuje ski staze sa drugim objektima na skijalištu, ili služi za izvlačenje (evakuaciju) povrijeđenih skijaša;
8. **zaštitna zona** ski staze je prostor širine 1-5 metara koji se prostire uz ski stazu;
9. **ski područje** je prostor na kojem se nalazi skijalište čije su granice udaljene 2 kilometra od krajnjih granica uređenih i obilježenih ski staza;
10. **specijalizovane zimske sportske aktivnosti** su sankanje, ski bob, skokovi, motosankanje, spuštanje gumama, skijanje u dubokom snijegu, paraglajding, skeleton i druge slične zimske sportske aktivnosti;
11. **takmičar** je fizičko lice aktivno uključeno u skijaško takmičenje ili trening za takmičenje na stazi ili dijelu staze određene od strane skijaškog centra;
12. **uobičajena opasnost i rizik skijanja** je opasnost odnosno rizik koji prosječan skijaš, pri potrebnoj pažnji, mora ili može predvidjeti da će postojati na vrsti staze koju koristi, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
13. **alpski rizik** je situacija koja sa sobom nosi veliki rizik za lica na skijalištu (opasnost lavine, odrona kamenja, pada u provaliju, zatrpavanja snijegom koji visi iznad litice, ekstremna zaleđenost staze ili ključnog dijela staze i sl.);
14. **neuobičajena i neočekivana opasnost skijanja** je opasnost odnosno rizik koju prosječan skijaš, pri potrebnoj pažnji, nije mogao predvidjeti da će postojati na vrsti staze koju koristi, pri datim vremenskim uvjetima, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
15. **smanjena vidljivost** postoji ako zbog nepovoljnih atmosferskih ili drugih prilika skijaš ne može jasno da uoči druga lica koja se nalaze na skijalištu na udaljenosti od najmanje 20 metara;
16. **skijaška nesreća** je nezgoda na stazi u kojoj je učestvovao najmanje jedan skijaš u pokretu i u kojoj je jedno ili više lica povrijeđeno ili poginulo ili je izazvana materijalna šteta;
17. **žičara** je sredstvo prijevoza sa posebnim saobraćajno - tehničkim osobinama (žičara i uspinjača) namijenjeno za prijevoz skijaša na stazu ili sa staze;
18. **ski lift** je sredstvo prijevoza za vuču skijaša po snijegu, uzbrdo;
19. **polazna stanica žičare ili lifta** je mjesto sa koga korisnici žičare ili lifta otpočinju vožnju;
20. **izlazna stanica žičare ili lifta** je prostor koji obuhvata plato za iskrcavanje sa okretnom stanicom ili povratnom užetnjačom;
21. **škola skijanja** je pravno lice ili preduzetnik registrovan za obavljanje poslova podučavanja skijanja i specijalizovanih zimskih sportskih aktivnosti;
22. **instruktor skijanja** je stručno lice koje podučava građane osnovnoj tehnici skijanja i specijalizovanih zimskih sportskih aktivnosti, a osposobljen je za rad u sportu u visokoškolskoj ustanovi ili ustanovi registrovanoj za poslove stručnog usavršavanja i osposobljavanja kadrova u sportu.

23. **učenik skijanja** je fizičko lice koje učestvuje kao polaznik škole skijanja za podučavanje skijanja i specijalizovanih zimskih sportskih aktivnosti;
24. **Nadležni sportski savez** je udruženje sportskih organizacija za obavljanje zimskih sportskih aktivnosti i djelatnosti, a koji radi na ostvarivanju zajedničkih interesa u skijanju naročito: usklađuje aktivnosti svojih članica; organizuje, uređuje i provodi sistem takmičenja; uređuje pitanja koja se odnose na registraciju sportista, njihov status, te odgovornost sportista; promovise stručni rad u sportu i brine se o kategoriziranim sportistima u okviru grane sporta skijanje
25. **Spasilački stacionar** je istureno odjeljenje bolničkog stacionara u smislu Zakona o zdravstvenoj zaštiti.

Član 4.

(Javno skijalište)

- (1) Javno skijalište je uređena javna površina, pogodna za organizovanje skijanja i specijalizovanih zimskih sportskih aktivnosti sa objektima, uređajima i opremom čije je korišćenje odnosno izgradnja od opšteg interesa.
- (2) Javno skijalište se može koristiti za obavljanje djelatnosti i pružanje usluga na skijalištu, pod uvjetima jednakim za sve korisnike u skladu sa ovim Zakonom.
- (3) Alpsko i nordijsko skijanje kao i podučavanje skijanju se može obavljati samo na uređenim ski stazama.
- (4) Ski skokovi, kao i podučavanje ski skokovima se može obavljati samo na obezbjeđenim skakaonicama predviđenim za ski skokove.
- (5) Skijanje na travi, kao i podučavanje skijanju se može obavljati samo na predviđenim i uređenim stazama za skijanje na travi.
- (6) Specijalizovane zimske sportske aktivnosti i početničke škole skijanja mogu se obavljati na ski poligonima koji moraju biti jasno obilježeni i vidljivo odvojeni od ski staza.
- (7) Javnim skijalištima, kao i drugim posebno uređenim površinama, namjenjenim za skijanje i za specijalizovane zimske sportske aktivnosti, upravlja skijaški centar u skladu sa ovim Zakonom.
- (8) Odredbe ovog Zakona koje se odnose na javno skijalište shodno se primjenjuju i na druge posebno uređene površine namjenjene za skijanje i specijalizovane zimske sportske aktivnosti, ako ovim ili drugim zakonom nije drugačije određeno.

Član 5.

(Djelatnost od opšteg interesa)

- (1) Uređenje, opremanje, održavanje, korišćenje i upravljanje javnim skijalištem (u daljem tekstu: skijalište), kao i upravljanje prostorima pogodnim za uređenje skijališta, u smislu ovog Zakona, smatraju se djelatnostima od opšteg interesa.

(2) Za obavljanje djelatnosti iz stava (1) ovog člana skijaški centar se osniva kao javno preduzeće, u skladu sa zakonom kojim se uređuje pravni položaj javnih preduzeća i uvjeti i način obavljanja djelatnosti od opšteg interesa.

(3) Za uređenje, opremanje, održavanje, korišćenje i upravljanje drugim posebno uređenim površinama, namjenjenim za skijanje i specijalizovane zimske sportske aktivnosti, skijaški centar se osniva kao privredno društvo, odnosno kao drugi oblik preduzeća ili preduzetnik.

(4) Aktivnosti iz prethodnih stavova ovog člana mogu se obavljati i putem javno-privatnog partnerstva, pri čemu se shodno primjenjuju zakonski i podzakonski propisi koji regulišu javno-privatno partnerstvo.

Član 6.

(Odgovornost za štetu)

(1) Na odgovornost za štetu prouzrokovanu na skijalištu primjenjuju se opšta pravila o odgovornosti za štetu.

(2) Pravom na naknadu štete prouzrokovane na skijalištu ne obuhvataju se one štete koje su rezultat uobičajene opasnosti i rizika skijanja.

DIO DRUGI

UREĐENJE, OBILJEŽAVANJE, KORIŠĆENJE I BEZBJEDNOST NA SKIJALIŠTU

PRVO POGLAVLJE

UREĐENJE

Član 7.

(Skijalište)

Skijalište se sastoji iz jedne ili više ski staza, ski poligona, ski puteva, ski ruta, ski liftova, žičara, infrastrukturne mreže i objekata, servisnih objekata skijališta, snježne i servisne mehanizacije, servisnih puteva, sopstvenih energetske objekata, pristupnih puteva i parkinga na ulazima u skijalište, objekata za obavljanje djelatnosti.

Član 8.

(Uređivanje skijališta i ski staza)

(1) Skijalište i pristupni putevi do skijališta ne mogu se graditi na površinama koje su pod uobičajenim sniježnim padavinama izložene lavinama.

(2) Skijalište i ski staze se uređuju u zavisnosti od toga za koju su rekreativnu ili takmičarsku zimsku sportsku aktivnost namijenjene, tako da su skijaši zaštićeni od neuobičajenih i neočekivanih opasnosti skijanja i alpskih rizika.

(3) Skijalište mora biti tako uređeno da zadovolji uvjete u pogledu očuvanja i zaštite životne sredine kao i odgovarajuće sanitarno-higijenske uvjete.

- (4) Pod uređivanjem skijališta i stvaranjem uvjeta za njegovo sigurno korištenje smatra se:
- a. prethodno tehničko uređivanje i tekuće održavanje skijališta,
 - b. zaštita od lavina,
 - c. postavljanje zaštita ispred zgrada, javnih puteva, provalija, šuma, stupova, stijena, vododerina, potoka i drugih opasnih mjesta,
 - d. postavljanje oznaka zabrana, upozorenja i obavijesti,
 - e. osiguranje službe spašavanja i pružanja prve pomoći,
 - f. osiguranje sistema veza na skijalištu i veza sa zdravstvenom ustanovom i službom unutrašnjih poslova,
 - g. osiguranje redarske službe na skijalištu.

Član 9.

(Ski staze)

- (1) Ski staze na skijalištu moraju biti široke, pregledne, sa nagibom i visinskom razlikom i pripremljene tako da na njima nema rupa, vrtača, kamenih kompleksa ili drugih opasnih mjesta.
- (2) Opasna mjesta na ski stazi (krivine, ukrštanje staza, veće strmine, objekti, mjesta gdje se izvode radovi) moraju biti posebno obilježena i osigurana ogradama za usmjerenje, zaštitnim ogradama ili mrežama, oblogama protiv udaraca i sličnim sredstvima zaštite.

Član 10.

(Zabrana postavljanja reklama i natpisa)

Na ski stazi i zaštitnoj zoni ski staze nije dozvoljeno postavljanje reklama i natpisa koji nisu vezani za korišćenje staze, osim reklamnih poruka na ogradi skijališta - ski staze.

Član 11.

(Izgradnja žičare)

Izgradnja žičare na prostorima koji su pogodni za skijanje predstavlja radnju uređenja skijališta, u skladu sa ovim Zakonom.

Član 12.

(Količina snijega)

- (1) Ski staza može da se koristi za skijanje samo ako na njoj postoji količina snijega koja je dovoljna za nesmetano skijanje bez povećanog rizika.
- (2) Odluku o tome da li na ski stazi ima potrebna količina snijega za prirodnu ili vještačku podlogu za nesmetano skijanje bez povećanog rizika, donosi šef staza iz člana 49. ovog Zakona.

Član 13.

(Liftovi, žičare i staze)

Skijaški centar obavezan je odrediti brojeve liftova, žičara i staza. Liftovi, žičare i staze mogu imati i nazive.

Član 14.

(Prostor za polijetanje i slijetanje)

- (1) Delta-plan i druga sredstva sportskog vazduhoplovstva ne smiju polijetati i slijetati na ski stazu.
- (2) Ukoliko je u okviru skijališta ureden prostor za polijetanje i slijetanje, on mora biti jasno razdvojen od ski staze, odgovarajuće signaliziran i obezbijeđen od lavina.

Član 15.

(Osvjetljenje na skijalištu)

Skijalište, odnosno njegove staze namijenjene skijaškim aktivnostima noću moraju imati odgovarajuće osvjetljenje, uključujući i neposredne prilaze, kao i trasu vertikalnog transporta koja se koristi, tako da je osigurana bezbjednost svih lica koja se nalaze na stazi i njenim prilazima.

Član 16.

(Sletišta za helikoptere za pružanje hitne pomoći)

U okviru skijališta ili njegovoj neposrednoj blizini obavezno je uređenje odgovarajućeg mjesta za slijetanje helikoptera u cilju obezbjeđenja pružanja hitne pomoći.

Član 17.

(Ski staze namjenjene za takmičenja)

- (1) Ski staza koja je pored rekreativnog namjenjena i takmičarskom skijanju ili samo takmičarskom skijanju uređuje se tako da ispunjava posebne uvjete (visinska razlika, dužina i širina staze, debljina snijega, zaštitne mjere, prepariranja staze, markiranje i dr.) utvrđene odgovarajućim Međunarodnim takmičarskim pravilima koje je propisala Međunarodna skijaška federacija (FIS) i nacionalnim sportskim pravilima.
- (2) Takmičarska ski staza mora za vrijeme korišćenja u svrhe rekreativnog skijanja da bude tako uređena da ispunjava opšte uvjete utvrđene ovim Zakonom u pogledu markiranja, signalizacije i preduzimanja mjera koje osiguravaju bezbjednost skijaša.
- (3) Skijalište koje je u skladu sa ovim Zakonom utvrđeno kao sportski objekat od javnog interesa ima najmanje jednu ski stazu uređenu i homologizovanu, u skladu sa sportskim pravilima, za nacionalna i međunarodna skijaška takmičenja.

DRUGO POGHLAVLJE OBILJEŽAVANJE

Član 18.

(Klasifikovanje i obilježavanje ski staza)

- (1) Ski staze se klasifikuju i obilježavaju (markiraju) prema stepenu težine, u zavisnosti od svojstava područja, odnosno površina preko kojih se pruža staza.

- (2) Ski staze se obilježavaju oznakama određenih boja. Oznaka je okruglog oblika prečnika 40 - 50 cm. Ski staze se prema težini klasifikuju i obilježavaju kao:
- a. laka staza - plava boja;
 - b. srednje teška staza - crvena boja;
 - c. teška staza - crna boja;
- (3) Ski rute i staze za moto sanke se markiraju žutom bojom nezavisno od stepena težine na način da oznake moraju biti tako postavljene da su više od snijega.
- (4) Ne moraju se obilježavati lako pristupačne i blago nagnute površine koje služe isključivo podučavanju osnovnih oblika vožnje skijama, pod uvjetom da nemaju rizičnih mjesta i da su jasno vidljive njihove granice, odnosno ivice.

Član 19.

(Granice skijališta)

- (1) Granice skijališta moraju biti označene na ključnim mjestima oznakama koje su vidljive u uvjetima normalne vidljivosti.
- (2) Označavanje granica skijališta vrši se štapovima narandžaste boje i tablom na kojoj se nalazi odgovarajući tekst.

Član 20.

(Panoramske table i table za orijentaciju)

Na skijalištu moraju da budu postavljene odgovarajuće panoramske table i table za orijentaciju.

TREĆE POGLAVLJE ODRŽAVANJE

Član 21.

(Obaveze Skijaškog centra na održavanju staza)

- (1) Skijaški centar obavezan je da za sve vrijeme trajanja ski sezone, odnosno za sve vrijeme upotrebe skijališta, kontroliše opšte stanje skijališta i da ga održava u ispravnom stanju, odnosno u stanju koje omogućava namjensko i bezbjedno korišćenje staze.
- (2) U vrijeme kada skijalište nije u upotrebi, skijaški centar je dužan da se stara o čuvanju skijališta i redovnom održavanju staza i opreme na skijalištu.
- (3) Održavanje ski staza obuhvata ljetnjo i zimsko održavanje.
- (4) Održavanje ski ruta, takmičarskih staza i specijalizovanih staza vrši se u zavisnosti od prirode staze, vremenskih uvjeta i zimske sportske aktivnosti koja se na njoj odvija.

(5) Skijaški centar je obavezan da održava žičaru i zaštitno područje oko žičare u stanju koje omogućava bezbjedno korišćenje žičare, u skladu sa ovim Zakonom i propisima donijetim na osnovu ovog Zakona.

Član 22.

(Minimalni tehnički uvjeti)

Minimalne tehničke uslove za uređenje, obilježavanje i održavanje skijališta propisat će Ministar Ministarstva za privredu Bosansko - podrinjskog kantona uz suglasnost Ministarstva za obrazovanje, mlade, nauku, kulturu i sport Bosansko - podrinjskog kantona Goražde.

ČETVRTO POGLAVLJE SIGNALIZACIJA

Član 23.

(Odgovarajuća signalizacija)

Na skijalištu mora biti postavljena odgovarajuća signalizacija, tako da se ne može lako ukloniti i da odgovara stvarnim okolnostima na stazi.

Član 24.

(Znakovi obavještenja, upozorenja, obaveza i zabrana)

- (1) Signalizacija se vrši postavljanjem odgovarajućih znakova obavještenja, upozorenja, obaveza, zabrana, dopunskih tabli i svjetlosnih signala.
- (2) Znaci na skijalištu postavljaju se i održavaju tako da su vidljivi, da ne ometaju korišćenje ski staza i da skijaši mogu na vrijeme da ih lako uoče i da blagovremeno postupe u skladu sa njihovim značenjem.
- (3) Postavljeni znakovi moraju da se uklone, dopune ili zamijene, ako njihovo značenje ne odgovara izmijenjenim uvjetima na skijalištu ili zahtjevima bezbjednosti.
- (4) Na skijalištu ne smiju da se postavljaju table, svjetla, stubovi ili drugi slični predmeti kojima se zaklanja ili umanjuje vidljivost postavljenih znakova ili koji svojim oblikom, bojom, izgledom ili mjestom postavljanja podražavaju ili liče na neki znak na skijalištu, ili zaslijepljuju skijaše ili odvrćaju njihovu pažnju u mjeri koja može biti opasna za bezbjednost skijanja.
- (5) Vrstu znakova, njihovu sadržinu, mjesto postavljanja i druga pitanja od značaja za ostvarenje funkcije znakova na skijalištima uredit će se posebnim pravilnikom koji donosi ministar Ministarstva za privredu Bosansko-podrinjskog kantona Goražde.

PETO POGLAVLJE
NEOBEZBJEĐENE STAZE

Član 25.

(Neobezbjedene i divlje ski staze)

- (1) Na divljim ski stazama, neobezbjedenim stazama i van skijaških staza, skijaši se skijaju na sopstveni rizik.
- (2) U cilju spriječavanja korišćenja divljih ski staza, skijaški centar je obavezan da u okviru skijališta postavi odgovarajuća upozorenja, zabrana i znakove opasnosti od sniježnih lavina, sniježnih streha, okomitih litica i rasjeda.

ŠESTO POGLAVLJE
SREDSTVA PREVOZA NA SKIJALIŠTU

Član 26.

(Upotreba službenih motornih vozila, motornih sanki i mehanizacije)

- (1) Na ski stazi, osim službenih motornih vozila, ne može biti prisutno ni jedno drugo motorno vozilo, osim ako ovim Zakonom nije drugačije određeno.
- (2) Motorne sanke, osim službenih motornih sanki u službi ski centra mogu da se koriste samo na specijalizovanim stazama i površinama koje su posebno pripremljene i obilježene za korišćenje motornih sanki van područja koje je obilježeno kao ski staza i pristupni put.
- (3) Na korišćenje motornih sanki na skijalištu, obaveze postupanja u slučaju nesreće, mjere bezbjednosti u pogledu vozača i druga pitanja koja se tiču korišćenja motornih sanki na skijalištu, primjenjuju se propisi koji se odnose na motocikle i bezbjednost saobraćaja na putevima.
- (4) Vozač motornih sanki ne smije vozilom da se kreće na stazi brzinom većom od 40 km na sat, odnosno brzinom većom od brzine dozvoljene postavljenim znakom za cijelu stazu ili njen dio.
- (5) Motorne sanke u službi spašavanja moraju biti obilježene znakom službe. Znak se postavlja na vidnom mjestu, veličine 40 cm u prečniku.
- (6) Mehanizacija za uređenje ski staze može da se koristi u vrijeme kada žičare i ski liftovi ne rade.
- (7) Ukoliko je upotreba mehanizacije za uređenje ski staze nužna za vrijeme rada žičara i ski - liftova, skijaški centar je dužan da preduzme posebne mjere za obezbjeđenje sigurnosti skijaša.
- (8) Svako vozilo mehanizacije za uređenje ski staze koje radi na pripremanju ski staze ili se kreće na skijalištu mora da bude obojeno uočljivom bojom i opremljeno odgovarajućim svjetlima.
- (9) Svako vozilo mehanizacije za uređenje ski staze koje se nalazi zaustavljeno na stazi mora biti označeno odgovarajućim svjetlima.

Član 27.

(Održavanje u tehnički ispravnom stanju)

- (1) Skijaški centar obavezan je da žičare, ski liftove i staze za visinski prijevoz, održava i koristi u tehnički ispravnom stanju sa dovoljnim brojem obučenog osoblja.
- (2) Kada je žičara, ski lift i mehanizacija za uređenje skijaških staza u upotrebi mora se obezbediti:
 - a. stalna kontrola rada i tehnička ispravnost;
 - b. stalno održavanje i pravilno vršenje eksploatacije;
 - c. neposredno pružanje pomoći korisnicima, posebno djeci u slučaju očigledne opasnosti ili na zahtjev korisnika;
 - d. dovoljan broj preglednih informacija i uputstava o ponašanju korisnika na sredstvima visinskog prijevoza;
 - e. stalna koordinacija između stanja na stazama i upotrebe žičare.

Član 28.

(Pravila za upotrebu žičara i ski liftova)

Pravila koja se primjenjuju na žičare i ski liftove iz člana 27. ovog Zakona primjenjuju se i na ski liftove sa vučnim užetom ispod glave skijaša kao i ski liftove za vuču po travi.

Član 29.

(Javni prijevoz žičarom)

- (1) Prijevoz žičarom je oblik javnog prijevoza i obavlja se prema utvrđenom redu vožnje, koji mora biti uočljivo istaknut na polaznoj i završnoj stanici.
- (2) Skijaški centar obavezan je da skijaše upozori na odgovarajući način o mogućnosti oduzimanja ski passa zbog ponašanja suprotnog ovom Zakonu i pravilima o redu na skijalištu.

Član 30.

(Prekid rada žičare i ski lifta)

Skijaški centar može da prekine rad žičare ili ski lifta tek kada odgovorno lice, redar ili dežurni spasilac potvrdi da nijedno lice više ne koristi žičaru ili ski lift.

SEDMO POGLAVLJE KORIŠTENJE I RAD SKIJALIŠTA

Član 31.

(Djelatnosti skijaškog centra)

Skijaški centar može da obavlja djelatnosti, odnosno poslove vezane za korišćenje skijališta pod uvjetima:

- a. da uredi i opremi skijalište u skladu sa ovim Zakonom, tako da je ono bezbjedno za korisnike;

- b. da obezbjedi službu održavanja reda na skijalištu i da uredi red na skijalištu (pravila o redu na skijalištu);
- c. da obezbjedi službu spašavanja;
- d. da obezbjedi pružanje hitne medicinske pomoći na skijalištu;
- e. da obezbjedi sistem veza na skijalištu i vezu sa najbližom zdravstvenom ustanovom i organom unutrašnjih poslova;
- f. da obezbjedi (dnevno i dugoročno) praćenje vremenske situacije u području gdje se nalazi skijalište (meteorološko bdijenje);
- g. da zaključi ugovor o osiguranju skijaša i drugih neposrednih korisnika skijališta od posljedica nezgoda na skijalištu;
- h. da donese plan rada za ski sezonu;
- i. da utvrdi pravila o korišćenju ski liftova i žičara, motornih sanki i mehanizacije za uređenje ski staza.

Član 32.

(Oprema skijaškog centra)

Skijaški centar mora da obezbjedi da skijalište bude opremljeno:

- a. odgovarajućim brojem mašina i uređaja za pripremu i održavanje staza, srazmjerno broju i veličini staza;
- b. razglasnim uređajem takve jačine da se može efikasno koristiti na skijalištu;
- c. sportskom i drugom opremom potrebnom za korišćenje skijališta u skladu sa ovim Zakonom i propisima donijetim na osnovu ovog Zakona.

Član 33.

(Stručno osposobljavanje i usavršavanje)

Skijalište može da se koristi za stručno osposobljavanje i usavršavanje u zimskim sportovima samo od strane organizacija koje ispunjavaju zakonom propisane uvjete.

Član 34.

(Javnost rada)

Skijaški centar obavezan je da obavijesti javnost preko sredstava javnog informisanja o početku i završetku korišćenja skijališta u tekućoj skijaškoj sezoni, kao i o svakom prekidu rada skijališta dužem od tri dana tokom skijaške sezone.

Član 35.

(Tehnički i vremenski uvjeti)

- (1) Takmičarsko i rekreativno skijanje, skijaška obuka i drugi oblici skijaških aktivnosti mogu se vršiti kada vremenski uvjeti omogućavaju bezbjedno korišćenje usluga na skijalištu.
- (2) Skijalište može da radi noću ukoliko postoje tehnički i vremenski uvjeti i ako je obezbijedena sigurnost skijaša.

Član 36.

(Opasnost i smanjena vidljivost)

Takmičarsko i rekreativno skijanje, skijaška obuka i drugi oblici skijaških aktivnosti ne mogu se vršiti na skijalištu:

- a. ako postoji opasnost od lavina;
- b. za vrijeme sniježne vijavice, kiše, magle zbog koje je smanjena vidljivost i vjetra koji ugrožava bezbjednost vožnje, prema tipu žičare;
- c. kod visokog snijega - svježeg koji nije utaban i na snijegu koji je usljed naglog topljenja postao suviše mekan;
- d. ako na stazama nema dovoljno snijega;
- e. ako su bezbjednosni uređaji i oznake toliko oštećeni da ne obezbjeđuju sigurnost skijaša ili za njega predstavljaju opasnost, kao i za vrijeme rada mašina za utabavanje snijega;
- f. ako ne funkcioniše sistem veza na skijalištu;
- g. ako nije osigurana redarska služba, služba spašavanja i služba pružanja prve pomoći;
- h. i drugih uslova koji mogu uticati na bezbjednost.

Član 37.

(Prekid rada na skijalištu)

- (1) Kada na skijalištu nastupe okolnosti iz člana 36. ovog Zakona, skijaški centar je dužan da prekine rad na skijalištu ili dijelu skijališta.
- (2) Prekid rada traje sve dok traju okolnosti zbog kojih je uveden.
- (3) Ukoliko se zatvaranje ski staze vrši u toku dana, korisnik je obavezan da preduzme kontrolnu vožnju kako bi osigurao da se skijaši koji se nalaze na stazi udalje iz ugroženog područja.
- (4) Skijaški centar obavezan je da objavi na pogodan način na ulazu u skijalište razloge privremenog prekida, odnosno zabrane korišćenja skijališta, ili jednog dijela skijališta.

OSMO POGLAVLJE SPASILAČKA SLUŽBA I SLUŽBA PRVE POMOĆI

Član 38.

(Spasilačka služba i služba prve pomoći)

- (1) Skijaški centar obezbjeđuje spasilačku službu samostalno ili u saradnji sa odgovarajućom organizacijom koja je obučena za spašavanje i pružanje prve pomoći povrijeđenom odnosno ugroženom skijašu na ski stazama i sredstvima i objektima skijališta.
- (2) Broj spasilaca zavisi od dužine i težine ski staza:
 - a. teška staza - na 1 km dužine - 2 spasilaca
 - b. srednje teška staza - na 1 km dužine - 1 spasilac
 - c. laka staza - na 2 km dužine - 1 spasilac

(3) Na skijalištu mora biti jasno i vidljivo označeno sjedište službe spašavanja, a spasioci moraju nositi posebnu uniformu i oznake.

Član 39.

(Brzo dejstvo spašavanja)

Služba spašavanja mora biti tako organizovana da je uvijek spremna za brzo dejstvo spašavanja (pružanje prve pomoći i brzog transporta) skijaša koji su pretrpjeli nesreću na stazi ili njenoj zaštićenoj zoni.

Član 40.

(Mjere spašavanja)

(1) Mjere spašavanja preduzimaju se isključivo preko lica, organa, ustanova i ili institucija stručno osposobljenih za spašavanje registrovanim kod nadležnih organa.

(2) Služba spašavanja u svom sastavu obavezno ima obučene ekipe za spašavanje skijaša sa žičare.

(3) Opremu za spašavanje sa žičara obezbjeđuje ski centar, na način da na svakih 30 sjedećih mjesta na žičari bude jedan komplet.

(4) Spasioci moraju imati prednost korišćenja žičara.

Član 41.

(Naknada troškova akcije spašavanja)

Skijaški centar ima pravo na naknadu troškova akcije spašavanja, osim ako je potreba spašavanja nastala usljed propusta u radu skijaškog centra.

Član 42.

(Jedinstvena služba spašavanja)

(1) Skijaški centar obrazuje jedinstvenu službu spašavanja za cijelo skijalište.

(2) Služba spašavanja djeluje u okviru skijališta.

(3) Ukoliko u ski području u kome se nalazi skijalište ne funkcioniše gorska služba spašavanja, skijaški centar je obavezan da u granicama ski područja organizuje spašavanje skijaša kojima je potrebna pomoć iako se nalaze izvan granica skijališta.

(4) Skijaški centar, u slučaju iz stava (3) ovog člana, ima pravo na naknadu prouzrokovanih troškova od lica kome je pružena pomoć, osim ako je potreba za spašavanjem izazvana propustima u radu skijaškog centra.

Član 43.

(Postupanje u slučaju nesreće na skijalištu)

Služba spašavanja, odnosno spasioci, u slučaju nesreće obavezni su da utvrde identitet lica koja su učestvovala u nesreći i da obezbijede dokaze vezane za prouzrokovanje nesreće, a u slučaju nastanka smrti ili teške tjelesne povrede da neodložno obavijeste najbliži organ Ministarstva unutrašnjih poslova Bosansko-podrinjskog kantona Goražde.

Član 44.

(Oprema i sredstva za spašavanje)

- (1) Oprema i sredstva za spašavanje moraju biti na skijalištu tako raspoređeni da su dostupni u najkraćem mogućem vremenu i smješteni u vidno označenom prostoru, uz stazu ili u spasavalačkom stacionaru koji mora biti smješten na najpogodnijem dijelu skijališta.
- (2) Skijaški centar mora na skijalištu obezbijediti odgovarajuću opremu i prostor za službu spašavanja i privremeno zadržavanje povrijeđenog ili iznenada oboljelog skijaša.
- (3) Skijaški centar obavezan je da na skijalištu stalno održava propisan obim opreme i sredstava za spašavanje u ispravnom stanju.
- (4) Skijaški centar obavezan je da postavi na skijalištu tablu sa opisom tzv. alpskog signala stanja nužde, koji daje skijaš kome je potrebna pomoć jer se nalazi u opasnosti.

Član 45.

(Hitna medicinska pomoć)

- (1) Skijaški centar obezbjeđuje pružanje hitne medicinske pomoći samostalno ili u saradnji sa odgovarajućom zdravstvenom ustanovom, u skladu sa Zakonom o zdravstvenoj zaštiti.
- (2) Skijaški centar obezbjeđuje, uređuje i obilježava prostor, heliodrom, za slijetanje i uzlijetanje helikoptera u službi spašavanja za spašavanje teško povrijeđenih.
- (3) Skijaški centar osigurava pružanje hitne medicinske pomoći angažovanjem odgovarajućeg broja osposobljenih lica, obezbjeđenjem odgovarajućeg prostora za prihvatanje povrijeđenih i obezbjeđenjem odgovarajuće opreme i sredstava za pružanje hitne medicinske pomoći.
- (4) Lica koja su angažovana za pružanje hitne medicinske pomoći moraju za vrijeme dežurstva nositi službenu odjeću i službenu iskaznicu, te biti opremljeni komunikacionim uređajima. Osoblju hitne medicinske pomoći mora biti obezbijeđena prednost u korišćenju žičara, kao i druge prednosti vezane za obavljanje njihove djelatnosti.

Član 46.

(Bliži uvjeti u pogledu prostora, opreme i obilježavanja službe spašavanja)

Bliže uvjete u pogledu prostora, opreme i obilježavanja službe spašavanja propisat će ministar Ministarstva za socijalnu politiku, zdravstvo, raseljena lica i izbjeglice Bosansko-podrinjskog kantona Goražde.

Član 47.

(Pravila o redu na skijalištu)

(1) Skijaški centar obavezan je da vidno istakne pravila o redu na skijalištu, cijene za korišćenje uređaja, opreme, prostora i usluga na skijalištu, kao i radno vrijeme skijališta i žičara i da ih se pridržava u svom poslovanju.

(2) Pravilima o redu iz stava (1) ovog člana bliže se uređuju, u skladu sa zakonom, prava i obaveze skijaša i drugih lica koja upotrebljavaju skijalište, način održavanja reda na skijalištu, vrijeme korišćenja skijališta, radno vrijeme žičara, pravila o organizovanju sportskih priredbi na skijalištu, upozorenja na eventualne opasnosti usljed vremenskih i sniježnih prilika i druga pitanja utvrđena ovim Zakonom koja se odnose na obezbjeđenje reda na skijalištu.

Član 48.

(Šef staza)

(1) Skijaški centar obavezan je da ima zaposleno lice na poslovima šefa staze koji mora biti upoznat sa lokalnim sniježnim uslovima i vremenskim prognozama.

(2) Šef staze je odgovoran za pripremu staza u skladu sportskim pravilima, za nacionalna i međunarodna skijaška takmičenja.

(3) Ski staza ne može početi da se koristi u toku dana ukoliko šef staze nije to odobrio, na osnovu procjene da su ispunjeni svi uslovi za bezbjedno korišćenje staze.

Član 49.

(Redarska služba)

(1) Skijaški centar obavezan je da za vrijeme rada skijališta ovisno o konkretnim okolnostima skijališta a naročito prema očekivanoj učestalosti korišćenja staze i broja korisnika, težine, veličine i preglednosti staze te procjene mogućnosti izbijanja nereda i nasilja osigurati redarsku službu i dovoljan broj redara, kako bi se efikasno osiguralo korišćenje skijališta u skladu sa odredbama ovog Zakona.

(2) Redarsku službu mogu činiti zaposleni u skijaškom centru na poslovima redara, redar dobrovoljac iz reda ostalih zaposlenika skijaškog centra, organizator sportske aktivnosti (obučavanje, trening i rekreativna aktivnost) i sportske priredbe (sportska takmičenja i sportske manifestacije) u skijaškom centru ili drugo lice koje ispunjava uslov za redara predviđen ovim Zakonom ili drugim zakonima.

- (3) Skijaški centar i organizator sportske aktivnosti (obučavanje, trening i rekreativna aktivnost) i sportske priredbe (sportska takmičenja i sportske manifestacije) mogu za poslove redarske službe angažovati agencije za zaštitu ljudi i imovine.
- (4) Pravilima nadležnog sportskog saveza, propisuje se minimalan broj redara za svako pojedino skijaško takmičenje, ovisno od nivoa takmičenja i procjeni rizika skijaškog centra odnosno organizatora sportske aktivnosti (obučavanje, trening i rekreativna aktivnost) i sportske priredbe (sportska takmičenja i sportske manifestacije).

Član 50.

(Uslovi za obavljanje poslova redara)

- (1) Lice koje obavlja poslove redara mora biti fizički i psihički sposobno za obavljanje poslova redara i koje nije osuđivano za prekršaj protiv javnog reda i mira.
- (2) Lice koje obavlja poslove redara u ophođenju sa prisutnim u skijaškom centru mora biti krajnje profesionalan i pristojan, spreman na pomoć u svakom momentu, ne smije biti pod uticajem alkohola ili opojnih droga, niti smije iskazivati svoju navijačku pripadnost ako je riječ o skijaškom takmičenju.

Član 51.

(Organizacija redarske službe)

- (1) Redarska služba mora biti organizovana na način koji osigurava da svaki redar zna koje mu je lice nadređeno.
- (2) Ako skijalište obezbjeđuje i policijski službenik, najviše rangirano lice u hijerarhiji komandovanja biće iz reda policije.
- (3) Policijskom službeniku koji obavlja poslove unutar skijaškog centra u civilnom odjelu skijaški centar dužan je obezbjediti nesmetano obavljanje posla.
- (4) Skijaški centar je obavezan obezbjediti da se na info table postavi raspored dežurstva, kopije iskaznica dežurnih redara sa fotografijama i brojem njihovih službenih telefona.

Član 52.

(Obilježja redarske službe)

Redar mora na odjeći imati vidljivo istaknutu oznaku ili natpis koji označava da je pripadnik redarske službe, pri čemu redar koji je zaposlenik agencije za zaštitu ljudi i imovine, mora nositi uniformu i iskaznicu te Agencije.

Član 53.

(Dužnosti i ovlaštenja redara)

- (1) Redari su dužni da:
 - a) štite prisutne u skijalištu te imovinu koja se nalazu u skijalištu,
 - b) utvrditi posjeduje li lice ski pass ili odgovarajuću ispravu izdatu od strane skijaškog centra te spriječiti neovlašteno korištenje ski passa,

- c) utvrditi posjeduje li lice koje ulazi ili se nalazi u skijalištu transparente, zastave, simbole i sl. kojima se iskazuje ili potiče mržnja ili nasilje na osnovu rasne, nacionalne, regionalne ili vjerske pripadnosti ili neke druge posebnosti i privremeno oduzeti takve predmete,
 - d) zabraniti pristup na ski stazu licu za koje se ocijeni da je pod utjecajem alkohola ili droge koje ne raspolažu ispravnom skijaškom opremom, koja prave nered na polaznim stanicama žičara ili koje ulazi ili se nalazi u skijalištu i posjeduje drogu, pirotehničko sredstvo, oružje ili drugi predmet pogodan za nanošenje povrede ili za stvaranje nereda i nasilja ili koje je poznato policijskom organu i redarskoj službi kao izazivač nereda;
 - e) zadržati prisutnog na skijalištu koji se nasilno ponaša ili drugačije remeti red i mir na skijalištu i predati ga policijskim službenicima,
 - f) onemogućiti gledaocima da pristupe u one dijelove skijališta koji nisu namijenjeni gledaocima,
 - g) lica zatečene u počinjenju prekršaja predati policijskim službenicima.
- (2) Isključivo od odredbe stava (1). tačka d) ovoga član, redari neće zabraniti pristup skijalištu sportistima koji unose sportsko oružje namijenjeno takmičenju u odgovarajućoj sportskoj grani ako se takmičenje održava u tom skijalištu.
- (3) Radi provođenja dužnosti iz stava (1). ovoga člana redari su ovlašteni:
- a) izdati upozorenje i naređenja, pregledati osobu, privremeno oduzeti predmete, utvrditi lične podatke, utvrditi posjedovanje passa, procijeniti prisutnost alkohola u organizmu, zabraniti i spriječiti ulazak u skijalište,
 - b) privremeno obustavi, do konačne odluke šefa staza, upotrebu skijališta ili nekog njegovog dijela na kome održava red, ako postoje okolnosti u kojima upotreba staze nije dozvoljena,
 - c) upozori, odnosno udalji sa skijališta ili njegovog dijela lica koja se ne pridržavaju pravila utvrđenih ovim zakonom i pravila o redu na skijalištu, koja ne raspolažu ispravnom skijaškom opremom, koja prave nered na polaznim stanicama žičara ili su pod uticajem alkohola ili droge,
 - d) prekine rad sredstava kosog transporta dok se ne uspostavi red na ulaznim ili izlaznim stanicama,
 - e) oduzme, trajno ili privremeno, kartu za vožnju skijašu ili drugom licu koje se i pored opomene redara ponaša suprotno odredbama ovog zakona, vozi na nizbrdici ugroženoj lavinom, ne poštuje znake zabrana i uputstava, postupa suprotno nalozima službe spašavanja ili ponovljeno čini povrede utvrđenih pravila ponašanja na skijalištu
 - f) uskrati jednu ili više vožnji sredstvima kosog transporta licu koje svojim ponašanjem ugrožava ili može ugroziti bezbjednost upotrebe skijališta, odnosno sredstava kosog transporta (lica pod uticajem alkohola ili psihoaktivnih supstanci, lica koja se ne pridržavaju utvrđenih pravila o ponašanju na skijalištu).
 - g) u obavljanju svojih poslova smiju upotrijebiti tjelesnu snagu ako na drugi način ne mogu odbiti istovremeni ili direktno predstojeći napad usmjeren prema sebi, prema gledateljima, prema učesnicima sportske aktivnosti (obučavanje, trening i rekreativna aktivnost) i sportske priredbe (sportska takmičenja i sportske manifestacije) i drugim licima i ako je napad usmjeren na uništenje ili oštećenje dijelova skijališta i njegove opreme.
- (4) Redari zaposlenici u agencijama za zaštitu lica i imovine i policijski službenici imaju i ovlasti propisane posebnim zakonima.

Član 54.

(Obaveze vođe organizovane grupe)

- (1) Vođa grupe koji na skijalište ili poligon dovodi organizovanu grupu djece ili skijaša početnika dužan je da se stara o njihovom bezbjednom skijanju. Prije početka skijanja vođa grupe mora upozoriti redare na grupu ili početnike kojima redari moraju posvetiti posebnu pažnju.
- (2) Vođa grupe mora ispunjavati naloge redara i prekinuti skijanje grupe ili početnika ako njihovo skijanje nije bezbjedno.
- (3) U slučaju zaustavljanja grupe iz stava (1) ovog člana na ski stazi, vođa grupe mora postaviti odgovarajući znak upozorenja na ski stazi iznad pozicije zaustavljene grupe.

DEVETO POGLAVLJE ORGANIZOVANJE SPORTSKIH PRIREDBI

Član 55.

(Organizovanje sportskih priredbi na skijalištu)

- (1) Na skijalištu se mogu organizovati sportske aktivnosti (obučavanje, trening i rekreativna aktivnost) i sportske priredbe (sportska takmičenja i sportske manifestacije) uz saglasnost skijaškog centra, pod uvjetima i na način utvrđen ovim Zakonom, Zakonom o sportu Bosansko - podrinjskog kantona Goražde, propisima donesenim na osnovu ovi zakona i pravila nadležnog sportskog saveza i međunarodne skijaške federacije (FIS).
- (2) Ski staza može da se koristi za takmičenja i treninge za takmičenja samo ako je uređena i homologizovana u skladu sa zakonom i odgovarajućim sportskim pravilima.
- (3) Za vrijeme sportske priredbe organizator sportske priredbe, pored prava i obaveza utvrđenih propisima kojima je uređena oblast sporta i sportskim pravilima nadležnog sportskog saveza za sportske priredbe, ima i prava i obaveze koji su ovim Zakonom utvrđeni za skijaški centar, ako sporazumom između skijaškog centra i organizatora nije drugačije utvrđeno.

Član 56.

(Pristup skijalištu na kome se održava takmičenje)

- (1) Na skijalištu odnosno njegovom dijelu na kome se održava takmičenje odnosno trening za takmičenje, pristup u toku održavanja takmičenja i treninga, mogu imati samo takmičari i službena lica organizatora, medicinsko osoblje i pripadnici službe spašavanja.
- (2) Službena lica organizatora obavezna su da blagovremeno obilježe odgovarajućim znakovima i zagrade ski staze na kojima će se održati takmičenje odnosno trening za takmičenje.
- (3) Pristupne staze za gledalište moraju biti uređene, vidno obilježene i ograđene.

(4) Organizator priredbe obavezan je da po završetku priredbe, prije otvaranja skijališta za redovnu upotrebu, ukloni oznake, uređaje, rekvizite i druge predmete postavljene radi održavanja priredbe.

Član 57.

(Skijaško takmičenje od interesa za Bosansko-podrinjski kanton Goražde)

(1) Skijaški centar obavezan je da omogućí korištenje skijališta za organizovanje skijaškog takmičenja od interesa za Bosansko - podrinjski kanton Goražde, koje je uvršteno u kalendar sportskih takmičenja u Bosansko - podrinjskom kantonu Goražde, Federaciji Bosne i Hercegovine ili državi Bosni i Hercegovini odnosno koje je uvršteno u Sistem i program takmičenja osnovnih i srednjih škola, školskih klubova/sekcija u Bosansko - podrinjskom kantonu Goražde i da za vrijeme održavanja takmičenja režim rada skijališta prilagodi potrebama takmičarskih uvjeta.

(1) Korišćenje skijališta iz stava (1) ovog člana reguliše se ugovorom između organizatora priredbe i skijaškog centra.

DESETO POGLAVLJE PODUČAVANJE SKIJANJU

Član 58.

(Škola skijanja)

(1) Usluge podučavanja skijanju na skijalištu može da pruža pravno lice ili preduzetnik u daljem tekstu (škola skijanja), uz saglasnost skijaškog centra, koja ispunjava slijedeće uvjete:

- a. da je registrovana za obavljanje djelatnosti sportskog podučavanja;
- b. da ima vidno obilježeno mjesto za okupljanje polaznika;
- c. da ima zaključen ugovor o osiguranju korisnika usluga podučavanja od posljedica nezgoda;
- d. da ima angažovana lica sa važećom licencom za neposredno podučavanje.

(2) Preduzetnik koji sam ispunjava uvjete propisane za instruktora skijanja, može da se bavi neposrednim podučavanjem skijanja i bez angažovanja drugih lica.

(3) Neposrednim podučavanjem može da se bavi samo instruktor skijanja sa važećom diplomom ili licencom.

(4) Uz instruktora može biti angažovan i asistent (samo za početnike škole skijanja).

(5) Instruktor skijanja i asistent moraju da za vrijeme podučavanja nose oznake i odjeću koja ih jasno identifikuju kao lica koja podučavaju skijanju.

(6) Škola skijanja može da se bavi samo onom vrstom podučavanja i one grupe polaznika koja odgovara sadržini diplome ili licence koju ima instruktor skijanja koji je angažovan u školi.

Član 59.

(Način korišćenja skijališta za školu skijanja)

Škola skijanja može da koristi skijalište za podučavanje skijanju na slijedeći način:

- a. da upozori redare na ski stazi na lica koja se podučavaju na stazi;
- b. da svojim učenicima prenese potrebna znanja vezana za tehniku skijanja i pravila ponašanja na skijalištu;
- c. da prije početka kursa testira učenike i razvrsta ih u homogene grupe prema uzrastu, znanju skijanja i fizičkim sposobnostima;
- d. da pruži hitnu medicinsku pomoć učeniku u slučaju potrebe;
- e. da za vrijeme podučavanja ima obezbjeđen priručni komplet prve pomoći;
- f. da njeni učenici poštuju obaveze vezane za ponašanje na stazi utvrđene ovim Zakonom i pravilima o redu na skijalištu.

Član 60.

(Obuka za početnike)

Početni kurs (obuka) škole skijanja može da se obavlja samo na posebno uređenim, izdvojenim i označenim stazama ili padinama pogodnim za skijanje.

Član 61.

(Ravnopravni uvjeti za korišćenje skijališta)

Skijaški centar je obavezan da obezbijedi ravnopravne uvjete u pogledu korišćenja skijališta svim školama skijanja, pod uvjetom da su ispunjene odredbe člana 59. ovog Zakona.

Član 62.

(Obuka bez sticanja dobiti)

- (1) Sportske organizacije, obrazovne ustanove, kao i državni organi i organizacije mogu da koriste skijalište za podučavanje skijanju isključivo za svoje članove i korisnike, bez svrhe sticanja dobiti.
- (2) Organi i organizacije iz stava (1) ovog člana ne mogu javno oglašavati i reklamirati podučavanje skijanju.

Član 63.

(Odgovarajuće sportsko zvanje)

Instruktor skijanja može da se bavi podučavanjem skijanja isključivo ukoliko je osposobljen za rad u sportu u skladu sa Zakonom o sportu Bosansko - podrinjskog kantona Goražde.

DIO TREĆI

NADZOR

Član 64.

(Nadzor nad izvršavanjem odredaba zakona)

- (1) Nadzor nad izvršavanjem odredaba ovog Zakona i propisa donijetih na osnovu njega, kao i drugih propisa kojima se uređuje djelatnost na skijalištu, vrši Ministarstvo za obrazovanje, mlade, nauku, kulturu i sport Bosansko-podrinjskog kantona Goražde i Ministarstvo za privredu Bosansko-podrinjskog kantona Goražde, svako iz svoje nadležnosti.
- (2) Inspeksijski nadzor nad primjenom ovog Zakona i propisa donijetih na osnovu njega vrši Kantonalna uprava za inspeksijske poslove Bosansko-podrinjskog kantona Goražde.
- (3) Inspeksijski nadzor nad organizovanjem sportskih priredbi na skijalištima i izdavanjem licenci instruktorima skijanja vrši Ministarstvo za obrazovanje, nauku, kulturu i sport Bosansko-podrinjskog kantona Goražde, putem ovlaštenog inspektora.
- (4) Inspeksijski nadzor nad primjenom ovog Zakona i propisa donijetih na osnovu njega u dijelu koji se odnosi na sredstva vertikalnog transporta (žičare i ski liftovi) vrši nadležni inspektor.

Član 65.

(Nadležnosti turističke inspekcije i ovlaštenja turističkog inspektora)

- (1) U vršenju inspeksijskog nadzora turistički inspektor ovlašten je da:
 - a. kontroliše ispunjenost uvjeta za obavljanje djelatnosti iz člana 31. ovog Zakona;
 - b. pregleda prostore i prostorije u kojima se obavlja djelatnost i pružaju usluge na skijalištu, ugovore, evidencije, isprave i drugu dokumentaciju potrebnu za utvrđivanje zakonitosti poslovanja skijaškog centra, kao i drugih pravnih lica i preduzetnika koji obavljaju djelatnost na skijalištu;
 - c. kontroliše da li skijaši i druga lica koriste skijalište na propisan način i sa odgovarajućom opremom.
- (2) Turistički inspektor ovlašten je da:
 - a. privremeno zabrani korišćenje skijališta ako skijaški centar ne ispunjava uvjete utvrđene ovim Zakonom;
 - b. privremeno zabrani rad skijališta ili dijela skijališta ukoliko nastupe okolnosti iz člana 36. ovog Zakona, a skijaški centar nije prekinuo rad skijališta;
 - c. privremeno zabrani rad licu koje nije registrovano za obavljanje djelatnosti i pružanje usluga na skijalištu ili obavlja djelatnost ili pruža usluge suprotno odredbama ovog Zakona i propisa donijetih na osnovu njega;
 - d. privremeno oduzme evidencije, dokumenta i druga dokazna sredstva od značaja za utvrđivanje činjeničnog stanja i privremeno oduzme predmete i sredstva čija upotreba nije dozvoljena u okviru sporta, kao i predmete i sredstva kojima se vrše nedozvoljene radnje;

- e. podnese prijavu nadležnom organu za učinjeno krivično djelo i podnese zahtjev za pokretanje prekršajnog postupka;
- f. preduzme druge mjere i radnje za koje je ovlašten zakonom.

(3) Inspektor će rješenjem utvrditi vrijeme trajanja privremene zabrane obavljanja djelatnosti, kao i rok u kome su lica koja obavljaju djelatnosti i pružaju usluge utvrđene ovim Zakonom, dužna da otklone nedostatke zbog kojih je mjera izrečena.

(4) Protiv rješenja turističkog inspektora može se izjaviti žalba direktoru Kantonalne uprave za inspeksijske poslove Bosansko-podrinjskog kantona Goražde, u roku od 15 dana od dana prijema rješenja.

(5) Žalba izjavljena na rješenje iz stava (4) ovog člana ne odlaže njegovo izvršenje.

Član 66.

(Ovlaštenja inspektora prilikom nadzora nad obavljanjem sportskih aktivnosti)

(1) U vršenju inspeksijskog nadzora nad obavljanjem sportskih aktivnosti na skijalištima, inspektor je ovlašten da naloži otklanjanje utvrđenih nepravilnosti i nedostataka u određenom roku i da zabrani obavljanje sportskih aktivnosti na skijalištu, ako nije obezbijedeno njeno nesmetano i bezbjedno održavanje.

(2) Protiv rješenja inspektora iz stava (1) ovog člana može se izjaviti žalba Ministarstvu za obrazovanje, mlade, nauku, kulturu i sport Bosansko-podrinjskog kantona Goražde, u roku od 15 dana od dana prijema rješenja, ukoliko zakonom koji uređuje inspeksijski nadzor u sportu nije drugačije određeno.

(3) Žalba izjavljena na rješenje iz stava (2) ovog člana ne odlaže njegovo izvršenje, ukoliko zakonom koji uređuje inspeksijski nadzor u sportu nije drugačije određeno.

DIO ČETVRTI. KAZNENE ODREDBE

Član 67.

(Novčane kazne za prekršaj pravnih i odgovornih lica)

- (1) Novčanom kaznom od 1.500,00 do 15.000,00 KM kazniće se za prekršaj pravno lice ako:
- a. ne učini skijalište dostupno svim korisnicima pod jednakim uvjetima (član 4. stav (2));
 - b. ne kontroliše opšte stanje skijališta i ne održava ga u ispravnom stanju, odnosno u stanju koje omogućava namjensko i bezbjedno korišćenje staza (član 21. stav (1));
 - c. ne održava žičaru i zaštitno područje oko žičare u stanju koje omogućava bezbjedno korišćenje žičare (član 21. stav (5));
 - d. ne uredi i opremi skijalište tako da je bezbjedno za korisnike (član 31. tačka a));
 - e. na skijalištu ne obezbijedi redarsku službu, službu spašavanja i službu hitne medicinske pomoći (član 31. tač. b) do d));
 - f. koristi skijalište suprotno članu 36. ovog Zakona;

- g. ne prekine rad skijališta ili njegovog dijela, kada nastupe okolnosti iz člana 37. ovog Zakona;
- h. ne omogući korišćenje skijališta za organizovanje skijaškog takmičenja (član 57.);
- i. koristi skijalište iako je privremeno zabranjeno korišćenje (član 65. stav (2) tač. a) i b));
- j. obavlja sportsku aktivnost i pored zabrane (član 66.).

(2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 300,00 do 3.000,00 KM.

Član 68.

(Novčane kazne za prekršaj pravnih i odgovornih lica)

- (1) Novčanom kaznom od 1.000,00 do 10.000,00 KM kazniće se za prekršaj pravno lice ako:
- a. dozvoli upražnjavanje specijalizovanih zimskih sportskih aktivnosti izvan ski poligona (član 4. stav (3));
 - b. odstupi od propisanih uvjeta za uređenje ski staza (član 8.);
 - c. posebno ne obilježi i ne osigura opasna mjesta na ski stazi (član 9. stav (2));
 - d. ne klasifikuje i ne obilježi staze prema stepenu težine (član 18);
 - e. dozvoli upotrebu motornih sanki na ski stazi suprotno članu 26. stav (2));
 - f. nema obezbijeđen sistem veza na skijalištu i vezu sa najbližom zdravstvenom ustanovom i organom unutrašnjih poslova (član 31. tačka e));
 - g. na ulazu u skijalište ne objavi na pogodan način razloge privremenog prekida odnosno zabrane korišćenja skijališta (član 37. stav (4)).

(2) Za prekršaj iz stava (1) ovog člana kazniće se odgovorno lice u pravnom licu novčanom kaznom od 200,00 do 2.000,00 KM.

Član 69.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 5.000,00 KM kazniće se za prekršaj pravno lice ako:
- a. upotrebljava mehanizaciju za uređenje ski staze za vrijeme rada žičara i ski- liftova, a ne preduzme posebne mjere za obezbjeđenje sigurnosti skijaša (član 26. st. (6) i (7));
 - b. ne propiše pravila o redu na skijalištu (član 31. tačka b));
 - c. ne pridržava se utvrđenog plana rada za ski sezonu (član 31. tačka h));
 - d. ne rasporedi opremu i sredstva za spašavanje tako da su dostupna u najkraćem mogućem vremenu i ne smjesti ih u vidno označenom prostoru (član 44. stav (1));
 - e. ne obezbijedi na skijalištu odgovarajuću opremu i prostor za službu spašavanja i zadržavanje povrijeđenog ili iznenada oboljelog skijaša (član 44. stav (2)).

(2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 100,00 do 1.000,00 KM.

Član 70.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 2.000,00 KM kazniće se za prekršaj pravno lice ako:
- a. ne označi granice skijališta na ključnim mjestima oznakama koje su vidljive u uvjetima normalne vidljivosti (član 19. stav (1));
 - b. vozila mehanizacije za uređenje ski staza ne oboji uočljivom bojom i ne opremi odgovarajućim svjetlima (član 26. stav (8));
 - c. ne pruži neposrednu pomoć korisnicima, posebno djeci, u slučaju očigledne opasnosti ili na zahtjev korisnika (član 27. stav (2) tačka c));
 - d. prekine rad žičara i ski liftova u trenutku kada jedno ili više lica koristi žičaru ili ski lift (član 30.);
 - e. ne obezbijedi praćenje vremenske situacije u području gdje se nalaze skijališta (član 31. tačka f));
 - f. dužim prekidima rada skijališta ne obavijesti javnost putem sredstava javnog informisanja (član 34.);
 - g. dozvoli rad skijališta noću, a za to ne postoje tehnički i vremenski uvjeti i nije obezbijedena sigurnost skijaša (član 35. stav (2));
 - h. vidno i jasno ne označi sjedište službe spašavanja (član 38. stav (3));
 - i. ne istakne pravila o redu, radno vrijeme skijališta i žičara, cijene za korišćenje uređaja, opreme, prostora i usluga na skijalištu i ne pridržava ih se u poslovanju (član 47. stav (1));
 - j. odredi za šefa staza lice koje ne ispunjava uvjete iz člana 48. st. (1) i (2) ovog Zakona;
 - k. ne angažuje ili ne organizuje odgovarajuću redarsku službu iz člana 49. i 51. ovog Zakona;
 - l. organizuje sportsku priredbu na skijalištu suprotno odredbama člana 55. ovog Zakona;
 - m. dozvoli pristup dijelu skijališta na kome se održava takmičenje licu koje nije takmičar ili službeno lice organizatora (član 56. stav (1));
 - n. organizator priredbe ne ukloni oznake, uređaje, rekvizite i druge predmete postavljene radi održavanja priredbe (član 56. stav (4));
 - o. pruža usluge podučavanja skijanju suprotno članu 58. ovog Zakona;
 - p. početni kurs škole skijanja obavlja suprotno čl. 59. i 60. ovog Zakona;
 - q. izda licencu instruktoru skijanja iako nisu ispunjeni propisani uvjeti (član 63.).
- (2) Za prekršaj iz stava (1) tač. p. i r. ovog člana kazniće se i preduzetnik novčanom kaznom od 1.000,00 do 10.000,00 KM.
- (3) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 200,00 do 2.000,00 KM.

Član 71.

(Novčane kazne za prekršaj fizičkih lica)

Novčanom kaznom od 150,00 do 1.500,00 KM kazniće se za prekršaj fizičko lice:

- a. ako koristi motorne sanke suprotno članu 26. stav (4) ovog Zakona;
- b. šef staza koji suprotno članu 48. stav (3) ovog Zakona odobri korišćenje staze iako nisu ispunjeni svi uvjeti za njeno bezbjedno korišćenje;
- c. ako ne postupi po nalogima redara (član 53).

Član 72.

(Novčane kazne na licu mjesta za prekršaj fizičkih lica)

Novčanom kaznom na licu mjesta u iznosu od 200,00 KM kazniće se za prekršaj fizičko lice ako:

- a. koristi motorne sanke suprotno članu 26. stav (2) ovog Zakona;
- b. kao vođa grupe djece ili skijaša početnika ne upozori redara na grupu ili ne ispuni naloge redara iz člana 54. ovog Zakona;
- c. radi kao instruktor skijanja, a nema zakonom predviđenu diplomu ili licencu.

Član 73.

(Novčane kazne za prekršaj fizičkih lica)

Novčanom kaznom na licu mjesta u iznosu od 200,00 KM kazniće se za prekršaj fizičko lice ako:

- a. kao spasilac ne nosi vidne oznake na uniformi koje ga identifikuju kao spasioca (član 38. stav (3.));
- b. za vrijeme obavljanja redarske službe ne nosi odjeću i oznake koje ga jasno identifikuju kao redara (član 53.);
- c. ponaša se suprotno odredbama član 51. i 54. ovog Zakona;
- d. kao instruktor skijanja za vrijeme podučavanja ne nosi oznake i odjeću koja ga jasno identifikuje kao lice koje podučava skijanju (član 58. stav (5)).

DIO PETI.

PRIJELAZNE I ZAVRŠNE ODREDBE

Član 74.

(Ravnopravnost spolova)

Odredbe ovog Zakona odnose se podjednako na osobe muškog i ženskog spola, bez obzira na rod imenice upotrijebljene u tekstu ovog Zakona.

Član 75.

(Rok za donošenje podzakonskih propisa)

Propisi koji se donose na osnovu ovlaštenja iz čl. 22., 24. stav (5), i 46. ovog Zakona biće donijeti u roku od šest mjeseci od dana stupanja na snagu ovog Zakona.

Član 76.

(Rok za usklađivanje općih akata)

Preduzeća i druga pravna lica uskladiće svoje opće akte i poslovanje sa odredbama ovog Zakona u roku od šest mjeseci od dana njegovog stupanja na snagu.

Član 77.

(Rok za ispunjavanje uvjeta zaposlenih lica)

Skijaški centar je dužan da obezbijedi da zaposlena, odnosno angažovana lica na poslovima šefa staza i redara ispune uvjete utvrđene ovim Zakonom u roku od dva mjeseca od dana stupanja na snagu ovog Zakona.

Član 78.

(Prestanak primjene Zakona i Pravilnika)

Stupanjem na snagu ovog Zakona na području Bosansko-podrinjskog kantona Goražde prestaje primjena:

- a. Zakona o javnim smučarskim terenima ("Službeni list Bosne i Hercegovine", broj 31/80),
- b. Pravilnika o znakovima na javnim smučarskim terenima i smučarskim stazama ("Službeni list Bosne i Hercegovine", broj 27/81),
- c. Pravilnika o korištenju i o redu na javnim smučarskim terenima ("Službeni list Bosne i Hercegovine", br. 38/82 i 33/87),
- d. Pravilnika o službi prve medicinske pomoći na javnim smučarskim terenima ("Službeni list Bosne i Hercegovine", broj 20/82),
- e. Pravilnika o stručnoj spremi i drugim uvjetima za obavljanje stručnog rada u organizacijama za fizičku kulturu ("Službeni list Bosne i Hercegovine", broj 16/87),
- f. Pravilnika o stručnoj spremi, osposobljenosti i stručnom nadzoru u ostvarivanju aktivnosti u sportu i sportskoj rekreaciji ("Službeni list SRBiH", broj 1/92).

Član 79.

(Stupanje na snagu Zakona)

Ovaj Zakon stupa na snagu osmog dana od dana objavljivanja u "Službenim novinama Bosansko-podrinjskog kantona Goražde“.

Broj: 01-_____/13
Goražde,_____.2013. godine

PREDSJEDAVAJUĆI SKUPŠTINE

Suad Došlo

O b r a z l o ž e n j e

I – PRAVNI OSNOV

Pravni osnov za donošenje ovog Zakona je sadržan u Poglavlju IV Odjeljak A člana 23. Ustava Bosansko – podrinjskog kantona Goražde („Službene novine Bosansko-podrinjskog kantona Goražde“, broj: 8/98,10/00 i 5/03).

Odredbama člana 16 i 17. Ustava Bosansko-podrinjskog kantona Goražde određeno je da "Kanton ima nadležnosti određene Ustavom Federacije i ovim Ustavom. U slučaju potrebe za tumačenjem, nadležnosti Kantona utvrđene ovim Ustavom će biti tumačene u korist Kantona po principu pretpostavljene nadležnosti, a pojedinačno spomenuta ovlaštenja u ovom Ustavu se neće tumačiti kao bilo kakva ograničenja općih nadležnosti Kantona.", a odredbama člana 23. Ustava Bosansko-podrinjskog kantona Goražde određeno je da "Skupština Kantona donosi zakone i druge propise u okviru izvršavanja nadležnosti Kantona izuzev propisa koji su ovim Ustavom ili zakonom dati u nadležnost Vlade Kantona".

Odredbama člana III. 4. Ustava Federacije Bosne i Hercegovine određeno je da "Kantoni imaju sve nadležnosti koje nisu izričito povjerene federalnoj vlasti.", a što se odnosi na ovaj pravni slučaj, jer predmetni zakon osim oblasti sporta (skijanje i srodni zimski sportovi) sadrži i pojedina pravna pitanja iz oblasti privrede i turizma, zaštite okoliša i saobraćajne infrastrukture.

II – RAZLOZI ZA DONOŠENJE

Procedura pripreme Nacrta Zakona pokrenuta je na inicijativu Ministarstva za privredu Bosansko-podrinjskog kantona Goražde obzirom da su zimski sportovi usko povezani sa turizmom i hotelijerstvom, te saobraćajnom infrastrukturom.

Takođe, Programom rada Skupštine Bosansko-podrinjskog kantona Goražde za 2013. godinu („Službene novine Bosansko-podrinjskog kantona Goražde“ broj:3/13), pod tačkom 74. predviđeno je donošenje Zakona o javnim skijalištima na području Bosansko-podrinjskog kantona Goražde, čiji je rok III-tromjesečje i čiji je obrađivač Ministarstvo za privredu BPK Goražde.

Ovim Zakonom propisuju se uvjeti za uređenje, održavanje i opremanje javnog skijališta, pružanje usluga na skijalištu, obilježavanje i postavljanje signalizacije na skijalištu, korištenje sredstava prijevoza na skijalištu, bezbjednost i red na skijalištu, podučavanje na skijalištu kao i druga pitanja koja su od značaja za korištenje skijališta.

III – OBRAZLOŽENJE POJEDINIH ODREDBI ZAKONA

DIO PRVI.- OSNOVNE ODREDBE

U ovom dijelu obuhvaćene su odredbe od člana 1. do 6.kojima se definiše sadržaj Zakona, primjena propisa, definicija pojedinih izraza, definisanje javnog skijališta, djelatnosti od javnog interesa te odgovornosti za štetu. Ove odredbe usaglašene su sa terminima i izrazima koji se upotrebljavaju u drugim važećim zakonima BPK Goražde a odnose se na sličnu materiju.

DIO DRUGI- UREĐENJE, OBILJEŽAVANJE, KORIŠTENJE I BEZBJEDNOST NA SKIJALIŠTU

Ovaj dio obuhvata odredbe od člana 7. do 63. i isti se sastoji od prvog poglavlja do desetog poglavlja. Ovim odredbama sadržanim u poglavljima od prvog do desetog, obuhvaćeni su praktično najbitniji dijelovi Zakona odnosno cijela suština pravnih radnji i pravnih rješenja koja se normiraju. Tako se kroz ove odredbe utvrđuju i propisuju obaveze ski centra, redarske službe, definišu elementi ski staze, upotreba motornih vozila, motornih sanki, mehanizacije, ski žičare i njen režim rada, obaveza uspostave spasilačke službe i prve pomoći te drugi elementi koje se trebaju definisati u smislu donošenja podzakonskih propisa. Isto tako, ovim odredbama utvrđuju se nadležnosti drugih organa i institucija koje po ovom Zakonu imaju određena prava i obaveze u primjeni i provođenju istog.

DIO TREĆI- NADZOR

U ovom dijelu koji obuhvata odredbe od člana 64. do 66. Zakona, propisuje se upravni i inspekcijski nadzor nad primjenom ovog Zakona, te prava i obaveze nadležnih organa za vršenje upravnog i inspekcijskog nadzora.

DIO ČETVRTI- KAZNENE ODREDBE

Obuhvataju odredbe člana od 67. do 73. i propisuje kaznene odredbe za pravna i fizička lica kao i odgovorna lica u pravnim licima.

DIO PETI- PRELAZNE I ZAVRŠNE ODREDBE

U ovom dijelu obuhvaćene su odredbe od člana 74. do 79. a odnose se na prelazne i završne odredbe, rokove za donošenje podzakonskih propisa, usklađivanje propisa te prestanak primjene drugih propisa koji su do sada bili na snazi kao i stupanje na snagu Zakona.

IV- SREDSTVA POTREBNA ZA PROVOĐENJE ZAKONA

Za provođenje ovog Zakona biće potrebna odgovarajuća novčana sredstva, međutim posmatrajući direktno izdvajanje sredstava iz budžeta Kantona, smatramo da se dosljednom primjenom ovog Zakona neće bitnije uticati na izdvajanje sredstava iz budžeta kantona. Gledajući s druge strane, budžetska sredstva koja su se do sada izdvajala za podsticajne mjere u oblasti sporta i turizma će na ovaj način biti podvedena pod zakonske norme, što znači da se izdvajanje sredstava treba zadržati na nivou postojećeg izdvajanja, ali u svrhu i ciljeve kao i namjenu koju propisuje ovaj Zakon.